




TAPAK 3

Minister Sarma'er convoy-i tetsür ka dak atsük



TAPAK 8

Aluyimba ajungkettsü atema Pak nem China-i teyari agütsütsü: PM Khan

VOL. XVIII NO. 107 (ADOK 107) DIMAPUR

AMUNGNÜ (SUNDAY) AENJETI (JANUARY) 31, 2021

₹ 5.00

Feb 2 nü BAC senden alitsü

Dimapur, January 30 (TYO): Nagaland Legislative Assembly Speaker aser Business Advisory Committee (BAC) Chairman, Sharingain Longkumer-i BAC senden tanaben jateptsü lemtetogo, ta Commissioner & Secretary, NLA, Dr. P.J. Antony-i metetdaksü.

BAC senden ya January 9, 2021 nü agütsüba liasü saka kodamasüba timtem ajuruba

ajanga magitet. Anungji, tanaben February 2, 2021 anepdang 11:00 nü agütsü jazüker, ta Dr. P.J. Antony-isa ashi.

Sendenji Committee Room, Assembly Secretariat nung alitsü aser 13 buba Nagaland Legislative Assembly indang Session tenetbuba indang sentong yanglutsü. Anungji BAC züngsem ajak adentsü mepishia metetdaksür, ta paisa shisem.

NFHRCC-i kin 11 nungi MLA tem den senden amentsü

Dimapur, January 30 (TYO): Honibarnü Nagaland Foothills Road Coordination Committee (NFHRCC)-i Dimapur nung amenoka aliba Kin Hoho 11 den senden ka menogo.

Senden nung adenertemi Feburary 5, 2021 matongdangsa kin 11 nungi MLA ajak den asüngdangteper Trans Nagaland Expressway(Foothills Road)

atema senden ka ayonga amentsü lemtet.

Parnokisa State sorkar dang Head of Account renemtsü aser Doyang apu yangluzükba sülen tanüngba bill reprangshimtsü lemtet.

Senden nung adenertemisa Dimapur Phom Baptist Church-i NFHRCC nem Rs.30,000 tenla agütsüba pelashishia agizükba metetdaksü.

Tripura nung Covid-19 vaccine timba raksaa endok

Agartala, January 30 (Agencies): India nung Covid-19 vaccine timba raksaa endokbaji state ji Tripura lir.

Tripura nung vaccine dose 1,623 tashi raksago. Iba ya vaccine agütsüba tesemtem nung nisung peria maruba ajanga liasü.

India kübok state 5 nung Covid-19 vaccine dose 5,000 shi raksaa endokogo ta osang angazüker.

"Hokolbar nungi Honibar nikongdang 1:00 ako tsüngda Covid-19 vaccine indang vial 611 raksago" ta Tripura immunization officer Kallol Roy-i ashi.

"Health department-i Covid-

19 vaccine agütsütsüpur nisung peria mengutet" ta paisa ashi.

Vaccine indang vial ka nung dose 10-12 shi alir aser vial lapokba sülen ghonda 4 tsüngda amshitsüla.

Union health ministry-i vaccine 10-15% shi kabo raksaa endoktsü ta asadangtetba agi state shia nem vaccine talila agütsüogo.

"Vaccine karbo vial lapokba sülen ghonda 48 tema amshiteter, saka Covid-19 rubella, SARS virus indang vaccine jibo ghonda 4 tsüngda agütsütsüla. Khenkhenbo syringe ajanga mozü atsütetdang yimdoker" ta Roy-isa metetdaksü.

Sikkim school tem nung tetsü oshi 11 sayutsü

Gangtok, January 30 (Agencies): Sikkim nung taruba academic year nungi school tem nung tetsü oshi 11 tashi benoktsü.

PS Tamang-i aniba SKM sorkari Sikkim nung school ajak dang curriculum nung tetsü oshi 11 tenzüksü tetuyuba agütsüogo.

Kaketshirtemi tetsü oshi ka 'second language' ama shimtsü, ta Sikkim Education Department-i metetdaksü.

Tang Sikkim school curriculum nung tetsü oshi pezü-Bhutia, Nepali, Lepcha aser Limbu dena lir.

Sorkar school tem nung item

oshi pezü azünger. Iba nung ano oshi 7 bendenloksü.

Tetsü oshi tasen 7 ji-Tamang, Gurung, Mangar, Sherpa, Mukhia, Rai aser Newar lir.

"Nija school temia curriculum nung tetsü oshi 11 benoktsüla" ta Education Department-i sa metetdaksüogo.

"State sorkari three-language formula shimogo aser ibaji state nung aliba school ajak nung benshitsü. State sorkari agizüka aliba oshi 11 nungi 'second language' shimtsü aser third language ji Hindi asütsü" ta Sikkim Education Department-isa ashi.

PM Modi'er Act East ajanga Northeast ajangzüker: DoNER minister

Guwahati, January 30 (Agencies): Prime Minister Narendra Modi-i 'Act East' alizüng ayuba ajanga asenoki asen kidanger linüktem den tesentaktep akangshir, ta Union DoNER minister Dr Jitendra Singh-i ashi.

Asia Pacific Youth Exchange (APYE) nung Republic of Philippines Vice President, Maria Leonor Geron Robredo aser Mizoram chief minister Zoramthanga na den külemi o jembidang Dr Jitendra Singh-i Mizoram dang pelaba metetdaksü.

"Iba sentong ya Mizoram nung amongtsü agizükba atema pelar," ta pai ashi.

Northeast tesem ya international borders agi meketbanga lir aser Anüdoklen atema India'er kishi lir, Dr Jitendra-isa shisem.

Narendra Modi-i Prime Minister inyaksü tenzüka sülen nungi India-i Northeast tesem renlokdaksütsü atema balaka temolung agüja arur, ta paisa metetdaksü.

India-i anüdoklen aliba linüktem den takok ngua maparen inyaksüla aser arrtsülen

akangakanga alitsü atema Northeast state tem ya kanga tongtipang lir, ta paisa ashi.

Prime Minister Modi-i tebang aiba ajanga Indo-Bangladesh agreement takok ngua inyaktetogo, ya DoNER minister-isa ashi.

"Tarutsü anogotem Sustainable Development Goals (SDG) ajanga asenok len anitsü. Iba ajanga asenok lokti, rongsenkettsüng aser alima renloktsü. Asia Pacific lokti den sensaksemtsü atema iba sentong ayonger dang kanga pelar" ta Dr Jitendra Singh-isa metetdaksü.

COVID-19 Nagaland: Nisung 52 anepaludar

Dimapur, January 30 (TYO): Honibarnü Nagaland nung nisung 2 dak COVID-19 aliba putetogo aser tena züngsema nisung ajak agi 12,090 kümogo. Maneni, nisung 5 taneptsü anguba sülen tang nisung 52 anepaludar.

"Tanü Kohima nung nisung 2 dak COVID-19 alibaji putet. Tang tashi nung nisung 11,806 taneptsü

nguogo" ta Health & Family Welfare Director, Dr. Denis Hangsing-i metetdaksü.

Nagaland nung COVID-19 puteta alir nisung 88 süogo saka tasürtem rongnung nisung 10 bo tanga timtem ajanga asü. Külen, nisung 144 tashi tanga state temi ogo, ta paisa ashi.

"Nisung 12,090 rongnungi Traced Contacts 4,986, armed

forces personnel 4,6670, tanga state tem nungi arur 1,861 aser Frontline Workers 573 lir" ta Dr Hangsing-isa ashi.

Tang anepalurtem rongnung nisung 10 dak shirangba yimya terara lir aser 42 dakbo shirangba yimya kecha mali, ta paisa shisem.

Nagaland nung COVID-19 alitsü akok ta temolung melemi bilemba sample 1,24,820 tendangogo.

NSUI-i lanur asoshi mapa meshia lungkak aiter

Guwahati, January 30 (Agencies): Centre sorkari linük nung zünger aliba lanurtem nem mapa magütsütetba atema National Students Union of India (NSUI)-i Honibar nungi linük ajungalen lungkak aitba sentong ka tenzüko.

NSUI-i 'Naukri Do Ya Degree Wapas Lo' (mapa agüjanga mesüra degree meyipa agiang) ta ajaba lungkak aitba sentong tenzü.

Honibarnü New Delhi nung NSUI national president Neeraj Kundan-i Congress headquarters nung sentong tenzüksü.

"Onoki iba campaign ajanga

Centre sorkar tsüngdang mapa manguba khuret chichiba sayunür. BJP sorkari linük nung mapa manguba khuret koktettsü atema mebilemer aser India nung zünger mapa manguba lanurtem indang osang miimbanger" ta Kundan-isa ashi.

Iba campaign mapang NSUI-i zünger mapa manguba lanurtem nungi degree lakh pungu tashi bendentsü aser ibaji Centre sorkar nem kuli ama sayutsü sentong lir.

"Lanurtem atema mapa peria mali. Linük nung unemployment jenjang ya küm 45 nung tang ya tamajungtiba lir" ta NSUI General

Secretary Nagesh Kariyappa-ia ashi.

2014 küm BJP sorkari küm shia mapa crore 2 den timba adoktsütsü ta nangzüker aser ibaji bendenra mapa crore 12 lir saka parnoki ibaji meinyaktet, ta paisa shisem.

Sorkar atema tongtipangtiba mapaji lanurtem tashi itdaksütsüba aser mapa adokdaksütsüba lir, ta Nagesh Kariyappa-isa ashi.

"Parnoki linük nung lanurtem ashioksüogo. National Sample Survey Office ajanga unemployment ji 2017-18 nung 6.1 timba aküm. 2011-12 nungbo ibaji 2.2% dang liasü" ta paisa metetdaksü.

Central agencies den Assam aser Arunachal sorkartemi nisung 2 tepsettsü meranger: ULFA-I

Guwahati, January 30 (Agencies): Central intelligence agencies den Assam aser Arunachal Pradesh police temi totzü company nung mapa inyaker nisung ana tepsettsü meranger, ta ULFA-Independent-i tanü metetdaksüogo.

"Totzü company nung mapa inyaker nisung ana kümzüksü melena, Indian armed forces-i tena tepsettsü aser iba taiji onok nung tongloksütsü meranger" ta ULFA-Independent-i sangdong ka nung ashi.

Assam chief minister Sarbananda Sonowal aser Arunachal Pradesh chief minister Pema Khandu nati tena chiokdaksütsü atema armed operation asütsü shiogo, ta parnokisa ashi.

Assam aser Arunachal Pradesh chief minister temi armed forces aser intelligence agencies nem mapang

peria agütsütsü atema teinyaksü mapa shitak meinyaker, ta ULFA-I-isa metetdaksü.

"Iba mapa ya Unified Command-i anir inyaker aser Defence Intelligence Agency (DIA), Military Intelligence (MI), Research and Analysis Wing (RAW), Intelligence Bureau (IB), o National Investigation Agency (NIA) dena lir. Maneni, Assam aser Arunachal Pradesh Police nung intelligence department temia yariteper" ta parnoki ashi.

Quippo Oil and Gas infrastructure Pvt Ltd nung mapa inyaker ana dak langka ka danga atalokra, iba tebilemtsüji ULFA-I-i mabentsü. Iba taiji Indian Armed Forces dak tongloksütsü, ta sangdong nungsa metetdaksüogo.

ULFA-Independent-i sa February 16, 2021 tashi nung Bihar nunger Ram Kumar chioktsü atema

mapa inyaksü mapang latettsüogo.

"Company nungi February 16 tashi nung telangzüba kecha marura, onoki tasüngji Ram Kumar dak teinyaksü tim inyaksü. Joko mapang mapuloktsütsü" ta parnokisa ashi.

December 21, 2020 nü Radio operator Ram Kumar (35) aser drilling superintendent Pranab Kumar Gogoi (51) na ULFA-I aser NSCN telok kati pur ao. Tena ya Arunachal Pradesh kübok Changlang district nung Kumchaika drilling site nung mapa inyaka lia pur ao.

ULFA-I-i tena chioktsü atema Rs 20 crore meshir ta osang angazüker.

Taoba mapang ULFA-I-isa totzü company nung mapa inyaker nisung ana indang video sayaogo aser iba nung tenati pei pei state sorkartem dang tena chioktsü atema mapa inyaksü mepishia liasü.

Dr.Vizolie Z. Suokhrie den tepila sentong agi



Dimapur, Aenjeti/January 30 (TYO): Department of Health and Family Welfare-i achaayanga January 30 nü Directorate of Health & Family Welfare nung Principal Director Dr. Vizolie Z. Suokhrie den tepila sentong agiogo.

Iba sentong nung Minister H&FW Govt of Nagaland Pangnyu Phom, Abhijit Sinha Home Commissioner Government of Nagaland, Amardeep Singh Bhatia, IAS Principal Secretary, H&FW Govt of Nagaland aser Wezope Kenye Secretary H&FW Nagaland nung dena liasü.

Tepila o jembiba mapang Dr. Vizolie Z. Suokhrie-i, temoatsü ajak atema aser pa mapa tembanga inyaktettsüsa Tsüngremi anema toktsüba

atema tenünsang agütsü. Paisa, department tenzüka mapang par kinungertemi pa nungita yariba atema parnok danga kanga pelaba lemsatep.

Dr. Vizolie-i, mapa nung küm 35 janga jangradema inyakba lemsatepba den mapa inyakba mapang timtem, tetsükdaktsü aser taitsüba ajangshiba indang lemsatep, saka taitsüba ajangshidang jashia melei iba nungi angazütsü ajungshi. Pai ashiba agi, taitsüba ya pa atema arangshiba ama liasü aser "taitsüba melira taküm aliba ya tezüdangtsüka. Iba ya jangrademtsü lenmang ka aser tetsükdaktsütem maneni arutsü, saka tezümetangi tetsükdaktsütem den rarang," ta ashi.

Maneni Dr. Suokhrie-i,

COVID wara ya tayongzüka ka liasü, ajisüaka longjemer inyakba ajanga tang tashi takok nung arudar ta shia, teamwork tanüla mesamadaktsü maneni meranga inyaktsü pai ajak ajungmeso.

Sentong nung Nagaland In-Service Doctors Association (NIDA), MDNHAK, CMO & MS of districts, Nursing Association, Health & Family Welfare Department and Family nungi lenirtem o tatsütsü jemi.

Principal Director den külemi kasa anogo Dr. Medemmangyang Addl. Director, DoH&FW, Kenonuo Rutsa Jt. Director (Nsg) aser Pratima Lama Stenographer (Grade-II) nung dena tepila sentong agia liasü.

Mmhonlumo-i DTF Wokha nem tenünsang agütsü

Dimapur, Aenjeti/January 30 (TYO): January 28 nü Liphayan nung Wokha District Planning Board senden amenba mapang Advisor for Information Technology & Communication, Science & Technology, New & Renewable Energy, Mmhonlumo Kikon-i, wara den rara takok ngua rarartetba atema COVID-19, Wokha District Task Force (DTF) nem tenünsang agütsü.

Kikon-i, wara pokteter mezüngbuba jenjang nung infrastructure peria maliba den tenüngdakbatem agi anünga liaka state sorkari wara den raratsü atema lenla ajak asadangogo aser district nung nüburtem

anisermer tashidak prokshia aoba nokdangtsü atema nüburtem nem osang tejangja agütsüba aser tetuyuba balala sülen anidakdakja takok ngua nokdaktetogo, ta ashi.

Kikon, shiba High Power Committee for COVID-19 Nagaland nung züngsem ka lir, pai DTF züngsemtem dang, high power committee senden nung Wokha District Task Force nem tenünsang agütsüba aser wara azüokba nung state kübok Wokha District Task Force-i tajungtiba inyaktetba atema tushiba lemsatepa liasü.

DTF Wokha-i mapa kanga junga inyakba atema pelaba temaitsü Kikon-i, Wokha district

nem video conferencing equipment tem sempet agüja liasü.

Kasa mapang nung anküp o jembiba mapang Deputy Commissioner aser V/Chairman DPDB Wokha, Orenthung Lotha-i, DPDB senden takok nung katettsü atema jenjang ajak takok ngua agir ataba atema SDO (C) Ralan aser par team aser Ralan nung aliba nüburtem dang kanga pelaba lemsatep.

Paisa, state ana (Assam den) yimjung nung alitsüsa temzüng ozüng shidak benoka inyakba atema iba tesem nung amenoker aliba 142 & 155 CRPF Battalion Commandant aser sepaitem dang kanga pelaba lemsatepa liasü.



Barn of Eden NGO aser Imnasangla Longchar-i (social worker) achaayanga Lirmen yimtsüng nung January 23 nü angati medical camp ka ayongzüka katsüogo. Camp nung Dr. Priyanka Changmai MBBS, DNB (Pulmonary Medicine) aser Dr. Ashok Saraki MBBS, DNB (Internal Medicine) nati anir medical team kati yimdaklirtem temang anepaluja liasü. Yimdaklirtem tenüng nung village council-i, parnok mapa tajung atema pelaba lemsatepa liasü.

Raj Bhavan nung mapa nungi anenba ketdangsürtem den tepila sentong agi

Dimapur, Aenjeti/January 30 (TYO): Angh indang Secretariat nung mapa nungi anenba ketdangsür aser staff tem den January 30 nü Raj Bhavan Kohima nung tepila sentong agiogo.

Raj Bhavan nung ketdangsürtemi Additional Secretary, SK Sahoo; OSD, K. Isaac; Head Attdt, Bal Bahadur Sunar; Sweeper, Seno Angami;

Driver, Baburam Pradhan aser ADC to Governor, Wing Commander, Vikas Ramola, Indian Air Force nung den tepila sentong agi.

Sentong nung Additional Secretary, George Abraham-i, mapa nungi anenertem nem parnok mapa tajung asoshi tenünsang agütsü aser mapa nungi anener anisüngzüka alitsü imlaja ataba lemsatep.

Army-i NSCN-IM züngsem ka apu



Guwahati, Aenjeti/January 30 (TYO): Assam, Charaideo district kübok Namtola tesem nung Indian Army-i Hokolbarnü NSCN-IM züngsem ka puogo.

NSCN-IM züngsem ya Alem Wangsu ta jangjaogo, shiba Army-i ashiba agi, Nagaland kübok Tizit aser Assam nung Charaideo tesem nung rakzükrakdemba

maparen nung densema liasü.

Iba tesem nung telungpur inyaksangshiba osang tejangja ka angazüka sülen Army-i meita aoba sentong ka atyongzüka agi. Ita ana dak tema tanen makai meita ataba sülen takok nguogo.

Aija alisang ya Charaideo police nem bendanga agütsüogo, aser ken o maneni bushitsüngdangtsü.

Lokti tentet balalai Temjen Toy den asükhü lemsatep

Dimapur, Aenjeti/January 30 (TYO): Chief Secretary Temjen Toy asüba osang angazüka Nagaland Contractors & Suppliers Union (NCSU) mang ayimba sangdong ka ajanga lemsatepogo.

Pa kanga dang tedangshi lenir, pei tamangba nungi mainshi nokdakba nisung ka aser tebandang kecha makai nüburtem yaritsü atema mulunga aliba nisung ka liasü.

Nagaland Contractors & Suppliers Union-i asür kinungertem den asükhü lemsateper, ta NCSU tir Pele Khezhi aser General Secretary John Kath nati külem sangdong ka ajanga lemsatep.

Kasa mapang nung Chakhesang Public Organization-ia, Chief Secretary Temjen Toy asüba osang angazüka mang ayimba lemsatepogo.

CPO-i, pa ya Naga nung lokti nung khenyongi nisung balaka ta ashi.

CPO-isa, asür tanüla teti tatem makadak anisüngzükdakjang ta sarasademtsüba, CPO General Secretary Veduvo Rhakho-i sangdong ka ajanga lemsatep.

Maneni Gorkha Public Panchayat Kohima (GPPK)-ia, January 28 nü Chief Secretary

Nagaland Temjen Toy asüba osang angazüka aoksaba lemsatep. Pa asüba ya par kinunger aser state atema dang masü saka Gorkha nung atemaa takoksa tulu ta ashi.

Pa tetdangshi lenir ka liasü. Pa school azüngba mapang nungi Gorkha nungertem den sendaktema aruogo aser pai Gorkha Public Panchayat lokti liba maparen ajak nung shilem tajung agia ajungshia liasü. Pa asenok nungi pilaa oaka Gorkha nung den pa sendaktepa aliba tarutsü nunga menungraa bilemtettsü. Pa yimya tajungtem tushitsü langa lir aser pa state nung lokti ajaki kanga sakloka liasü. Pa asüba ya Panchayat aser Gorkha nung ajak atema takoksa lir. Panchayat-i Gorkha nung lokti atema pai mapa tajung inyaktsüba tem asoshi kanga pelaba lemsateper.

Gorkha Public Panchayat den Gorkha NGOs-i asükhü lemsateper aser Tulusang Tsüngremi asür tanüla tenti tesunep nung anisüngzükdakjang ta aser asür kinungertem, talisa, tsürapur, kinungsü, jala jabasotem nem mangyimjashi koktettsü atema tashi agüjang ta sarasademtsür, ta tir Santu Thapa-i sangdong ka ajanga lemsatep.



COME ONE, COME ALL



Do visit us at the
SPECIAL HANDLOOM EXPO

AT URBAN HAAT, DIMAPUR

From : 28/01/2021
Time : 10:00 a.m to 5:00 p.m

PARTICIPANTS FROM VARIOUS STATES OF INDIA.
A MEGA EVENT OF EXCLUSIVE RANGE OF HANDLOOM PRODUCTS,
DAY TO DAY UTILITIES & DECORATIVE ITEMS, INNOVATIVE &
WELL DESIGNED LADIES & GENTS WEAR, TRADITIONAL SHAWLS,
JACKETS, BED SHEETS, CUSHION COVER, CARPETS,
HANDICRAFT ITEMS, BASKETRY ETC.....

ENTRY
FREE

For Your Safety
Please Wear A Mask

Maintain
Social
Distancing

ENJOY THE HANDLOOM COLOURS OF INDIA



ORGANISED BY:
Nagaland Handloom & Handicrafts
Development Corporation LTD
(A Govt. of Nagaland Undertaking)
Dimapur : Nagaland



SPONSORED BY:
Office of the Development Commissioner
for Handlooms, Ministry of Textiles,
Govt. of India, New Delhi

Manipur nung National Sports University yangluba anendaka lir

Imphal, January 30 (Agencies): Manipur kübok Imphal nung National Sports University yangluba maparen anenogo.

Hokolbarnü police aser telok balala nungi züngsemtem tsüngda rara adokba sülen National Sports University maparen anenogo.

Iba lendong nung police pungu yiru. Hokolbarnü nisungtemi hadirtem bener National Sports University indang campus-i ao aser osettsüsettem raksatsü.

Police-i tensa azüoktsü atema tenük amdaktsüba mokozi amshia den mock bombs pokdaktsü.

Konsakhul Area Joint Action Committee (KAJAC)-i anir National Sports University yangluba anema noktaker aser

parnoki January 31 nungi National aser State Highway tem mokdangtsü ayongzüko.

Kangpokpi district nung telok balalai National Sports University yangluba kimung ya Kangpokpi district ketdangsübaren kübok lir. Ajiüaka, Imphal West district administration ajanga kimungji agütsü ta ashir.

Manipur sorkari lisopur ali tashiyim agi rakzüka NSU complex yangluba inyakyim anendaktsü atema mokdang, ta KAJAC-i metedaktsüo.

Maneni, Senapati district kübok Konsakhul yimer ali kiburtem hao ta agizükdaktsü atema iba mokdang ayonger. Mokdangba mapang onoki Naga tesemtem nung national projects ajak anendaktsü, ta KAJAC-isa ashi.



West Garo Hills kübok Embee Rose Bud High School, Tura nung Sparsh leprosy awareness campaign (Slac) indang sentong ka agidang tangokba noksa angur. Slac ya Anti-Leprosy Day nung tenzük aser kümshia Mahatma Gandhi tenüng nung amonger, kechiyong pai leprosy agi shirangertem bendanga agüja anepalu.

Tripura Pradesh Congress-i BJP anema lungkak ait

Agartala, January 30 (Agencies): Tripura nung mapa manguba khuret aser BJP state sorkari pusema nisungtemi opposition party tanishirtem amakba anema Agartala nung Tripura Pradesh Congress-i lungkak aitba sentong ka ayonga agiogo.

Agartala district administration-i ghonda 48 atema section 144 ozüng agüjaka, Hokolbarnü Tripura Congress-i lungkak aitba sentong agi.

Onoki ketdangsürtem dang nungi sentong agitsü atema 'special permission' meshi, ta Congress President Pijush Biswas-i ashi.

Congress tanishirtem aser party züngsemtem Netaji School nung adenshi aser BJP-i aniba

state sorkar anema lungkak ait. Parnoki Agartala nung yimdong sema lungkak aita senzü aser Rabindra Bhawan jakdang senden ka amen.

"Party züngsem ajaki Tripura nung Congress sorkar bener arutsüla" ta Congress lennir tejen Gopal Roy-i ashi.

1988 küm Tripura nung Congress-i state sorkar aküm.

"Tripura BJP-i Tripura Tribal Areas Autonomous District Council elections agitsü renema mali kechiyong parnoki tamakok angutsü ta meteta lir" ta Assam Congress lennir Susmita Dev-i ashi.

"Tripura nung BJP tashimait küma aor aser parnok anema asenok longjemtsüla" ta laisa ayongzüko.

Minister Sarma'er convoy-i tetsür ka dak atsük

Guwahati, January 30 (Agencies): Honibarnü Guwahati kübok Khanapara nung Assam education minister Himanta Biswa Sarma indang convoy-i tetsür tesayur ka dak atsük.

State sorkari nungi appointment letter manguba atema tejashi sayua Deepa Payeng-i garitem sülen anidakdang gari jagi la dak atsük.

Education minister Sarma-i Bodbarü elementary teachers 4511 nem appointment letters

lema agütsü.

State sorkari tesayur 12,000 nem appointment letters agütsüba liasü saka parnok 4511-i dang angu.

"State sorkari onok nem appointment letters magütsüba ajanga mezüngmeshiogo. Ni graduate ka lir aser 1995 nungi tesayur mapa inyaka arur" ta Dhemaji district kübok Jonai nung alir Payeng-i ashi.

Iba tesem nung appointment letters manguba tesayur telok katia lungkak ait.

Let the victory over Polio continue with two drops of life

POLIO ROUND 31 January 2021
Ensure every child under 5 years of age gets polio drops every time

#Unite2FightCorona

India is polio free. But polio still exists in few countries and it may come back. Ensure your child's complete protection. Make sure polio vaccine is given every time so that India maintains its victory over polio.

To know more, please contact ASHA/ANM/Anganwadi Worker

Ensure to follow COVID-19 protocols

- Don't forget to wear your mask to cover your nose and mouth.
- Maintain distance of 2 yards.
- Keep hands clean.
- Avoid crowding.

If feeling unwell

- Go for prompt testing, no prescription required.
- Prompt self isolation.
- Self isolate promptly.

www.mohfw.gov.in | www.pmda.gov.in | www.mv.gov.in | @MoHFW_INDIA



Manipur kübok Senapati district nung sorkar ketdangsürtemi acre 45 shi ka nung poppy alu raksaa endoktsüo. Iba mapa ya Senapati district police, Forest ketdangsürtem, Narcotics Control Bureau (NCB), Narcotics and Affairs of Border (NAB) aser tanga department tem yaritepa inyak.



TIR YIMYIM YIMOBILEM (EDITORIAL)

DIMAPUR AMUNGNÜ, AENJETI (JANUARY) 31, 2021

AJEMALURTEM

Alima tsütsü bilemdangbo ajemalurtemji tebur saka lapi, anungji yimten aser lokti nung tagidak makaba purtem amai asenoki bilemer. Ajisüaka, Yisuiبو ajemalurtemiang alima senmang amangtsü ta Mathi 5:5 nung shia lir. Aji oda, Yisui bilemba o asenoki bilemba naji amsa-am itta lir. Asenokibo alima senmangji terakzür meyong ta bilemer saka Yisui ashir, alima senmangji tashiyim amshia aseni aginüba rakzüka amangba agi mamangtettsü. Aji oda, Yisu tsüngdang ajemalurtemji alima tsütsü lapilarartemji masü mesüra tashimait aser tasümaitemtemjia masü. Yisui ashiba ajemalusangji arem shiti mesük, paji tashi kanga tait aser tasüa tait, pai kecha metsübur, ajisüaka kodang nisungtemi paji pua bener arua azüoker, nisung meyerijangia makoktsüba tashi aser tasü tait shiti to pa pua abener arua azüoksang kibur tsüngdang kanga ajemalua akümer. Iba shiti to kasa arem shiti, tesashi aser tetsübuttsü mit aketba shiruru, ajisüaka kiburi azüok nungji kiburi ashi anga ajemalua alir. Iba kasaji, ken mapang kabo asenoka nisung tesü, tamajung aser samaro, ajaki tsüba repringba nisung ser alitsüa akok, saka kodang Yisui asenok apu aser tanüla temeshi nem asenok azüokdaksü, asenok taküm to akhi memesük tesangwa, taremsük, kumli tajung aser tejungnü nisung akümer. Akhidang, kecha masü nung ain adoka tangar yiruja aliba nisung to tangbo tangar ain adokdang madoker, tangar jashidang mejashir, kümlü tasü kümer Tsüngremi mulungba nung dang jajar, kechiyong Tsüngremji dang pa taküm nung kibur ta pai angateta lir aser iba kibursang tashi jagi pa azüoka lir. Aji oda, ajemaluba tetezü asenoki asen temeten bushia tangar den metokteper saka Tsüngrem nem dang toktsür. Ajemaluba tetezü tanüla temeshi nem dang asen taküm aser mapa ajak bendanga agütsür. Aji oda, ajemaluba tetezüji talangka aremsükba aser asen mulung masü saka kibur mulung südaktsüba taküm yimya aser jakliro lir. Mosa kanga ajemaluba nisung liasü. Aji oda, Israel nunger amang agi sangwa küma arem aser lisem lima ajanga anir aruba Mosa dangji asenoki lapi ajatsü asü. Mesüra, ain adoker ozüng longpak jaksaa endokba nisungji lapi asü? Nisung tsütsü paji teburchi aser samaro. Ajisüaka, Tsüngremi azüokba agi ajemalu nisung aküm. Aji oda, Yirusalem tenla ki menenja shishilembartem aser sen melenertem mena aliba menden meküplokja aina adoksang Yisu Khrista dangji asenoki lapi ta ajatsü asü? Pai pa arishir dang kecha mashi. Kangki nung angenloktsüba mapanga Pai kotak nungi kotak tenyar meyi aika jakzüker Yihuda nungertem to ajak pua yuteta liasü, saka Pai aremsük, kechiyong yamaji inyaksübaji tebu memulung. Aji oda, Yisui ajemalua Yihuda nungertem nem kangki nung agenloktsüba ajanga Pa tashi tuluba nung shia aru. Iba jagi tanü asenoki Pa külemer. Pai alima aser kotak senmang amangtsüsa ajemalua pa taküm bendanga agütsü. Tanü asenok akümlirtem dang ajemalua lira, alima senmang amangtsü ta shia yutsüba Tsüngrem o ji tiyazü masü. Nai tendanga tangar dang aremsükdang, o tamajung tejembi, mapa tamajung teinyak, Tsüngremi mulungba bushiang aser aji inyakang. Atangji, alima nung ali senmang ajakji angutsü. Mathi 5:5 nung nangzüka senmang yabo ali shi taküm ya süitemer amangtsüba kotak senmang indang ashiba masü, saka tang akümlü nung amangtsüba ali rongsen indang ashir. Na teburchi aser samaro ta Tsüngremi meteta lir. Na tesangra, shisataka aser tasütait tetsür ta Tsüngremi meteta lir. Ajisüaka, Laishibai ashir, alima nung ali senmang amangtsüsa takar akümtsüba ya tasü aitba agi masü mesüra shisa akaba agia masü, saka ajemaluba agidang amangtsü. Tetezü, ajemaluba ya rongsen aruba lenmang aser iba lenmang nungi anguba rongsenjibo asen senmang asütsü. Ajisüaka, tekümdangtsü kaji samaro mapa inyakba agi mesüra asenok shisa akaba kija agi anguba rongsentemjibo asen senmang masütsü. Ibaji aseni ngua samatsü. Alima senmang amangnura, Laishibai ashir, AJEMALUANG.

OLEMSABANG SOBALIBAI KHRISTAN TAMANG AKANGSHIDAKTSÜBA

~ Wati Longchar (Serampore)

Sobaliba

Culture is the way we live. It is the clothes we wear, the food we eat, the language we speak, the stories we tell, and how we celebrate. It is the way we show our imaginations through art, music and writing. Culture is also about our roots.

Ao oshi nung 'sobaliba' ta asüba nungji tetezü aika dena lir. Idaki oshi-oyim, jembi-shinü, benjong-bentsü, külem-küja, aben-süoshi, yar-tsüongsang, jaya-jako, achi-ajemba, ola-angla, wain-shin, kiba-lempu, otsü-olem, putipuyang, yimden-yimli maparen, awashi, a.a. ajak dena lir. Sobaliba ya kija aser shilu ka azüoka ayuba puti aser maparen ta ashitsü akok. Meimchiri sobalibaji yanglur, raksar aser yanglushir. Sobaliba tajung wazüka ayutsübaji arok khuret.

Sobaliba ajanga kin ka ayak agütsür - Ao, Sangtam, Phom, Chang, Konyak, Lotha ta ayak jangjatsür. Sobaliba tentet ajak tajung dang ta mangatetsüla. Meimchiri yanglur aser meimchiri benschir asü nung tajung-majung aika meyoktepa lir. Sobaliba tajung ajanga meimchir rongnung temeimtep, yimjung aser telungjem adokdaksür. Kasaji sobaliba tamajungi meimchir rongnung, kidong or kidong na tsüngda, kin or kin na tsüngda rara aser mepelatep adokdaksür. Ano sobaliba ya memelenshir, melenshitsü makok ta angatetbaji tai, aser yamaji mejembitsüla. Meimchir ya taküm aliba shilu, anogo shia meimchir lokti melenshia aoba den sobaliba melenshiyonga aor. Koba sobalibai telok ka rajang kümdaksür aji melenshitsüla aser yanglushitsü tim. Tangar nungia sobaliba tajungbo angazüksü merangtsüla aser benschitsüla. Yamaji inyakba ajanga lokti kaji ainer aser temelenshi adokdaksür.

Khristan tamang

Ochi o aser mapa, tekümtet Osangtajung dang Khristan tamang ta ajar. Khristan tamang ya Yisu tesayuba dak tera yanga lir. Tejen Lai putu, meimchir rongnung Tsüngrem jungkai adokba kuli, ainkar shin o, aser Tasen Lai nung Yisu Khristai Tsüngrem ochi o aser mapa jungkai adok. Anungji Yisu Khrista ajanga tekümtet lemang jungkai adok. Khristan tamang ya Tsüngrem ochi dak tera yanga kar. Sobaliba kobala tajung, kobala majung, kobala shitak aser kobala meshitak aji Yisu Khrista mapa aser tesayuba ajanga jangjatsür, tuteta sayur; aser lokti ka ajungtsü aser tejakleni odaktsütsü asoshi koma, koda melenshitsü, yanglushitsü aji jangjatsür. Anungji sobaliba shitak-meshitak tebandang Osangtajung ajanga sayur.

Sobaliba aser Khristan Tamang tesendaktep

Sobaliba aser Khristan tamang ana ya balala, saka mepilatet sendaktepa lir. German nunger Laiputishir Ernst Troeltsch-i ashir sobalibaji tamangba yimsü meydaktsüba ali (Culture is the soil of religion) aser Paul Tillich-i yamai ashir, tamangba yimsü ya sobaliba tanela (religion is the soul of a culture). Tetezü, sobaliba aser Khristan tamang tesendaktep pilatsü makok ta ashirba lir. Sobalibai Khristan tamang tangatetba akhangshidaksür aser melenshidaksür; Khristan tamang sayu tali tarokba, tejangjaba aser nübur libaliro dak apet sobaliba ajanga adokdaksür. Kasaji sobaliba kobai lokti rajang kümdaksür aji melenshitsü, aser kobai lokti tejakleni odaktsür aji Khristan tamangi sayur. Khristan tamang yimsü marudang tetsü-tobu putu benschia aruba sobaliba aika, Osangtajung ajanga tai ta tuteta sayuba ajanga melenshiogo, tat.agi. khonang-naroküm bushia telolak bushiba, alar ayuba, arasenba, a.a. Kasaji sobaliba maparen aika Khristan yimsü ama küma baptitsür amshia arudagi, tat. agi., jaya-jako balala, kin-kidong balala tsüngda kibalembuba, awashi mapa balala, a.a. Tejen aser Tasen Lai anaprongla nung Yihuda nungertem tetsü-tobu sobaliba dang masü, parnok meketa aliba kintem sobaliba aika benoka Osangtajung ratettsüba angur. Tat. agi. Tejen Lai nung El Shaddai (Ao Laishiba nung Takoksang Tsüngrem ta meyipzüka lir - Lipok 17:1; 28:3; 35:11; 43:14; 48:7 medemdang) ta amshiba ya Mesopotamia aser Kanan nungeri par tsüngrem dang 'El' ta aja, saka Israel nungeri amangba Tsüngremji tematiba aser ajak Takoksang Tsüngrem (El Shaddai) ta amshia ratettsüba angur. Ano Tsüngremji temoatsür Tsüngrem ta ratettsü atema Kanan nungeri amangba tsüngrem Baal tangatetba nung ajemdaker Yihuba nunger Tsüngremi ajak poktetdaksür, aser temoatsü ajak Teyanglur nungi ta ratettsüba angur. Tejen Lai nung apijemtsü shin o, putipuyang, nungja-kuja a.a. ajak ya par meketa alir sobaliba den medemdanga Tsüngrem jungkai adok ochi o ratettsüba lir. Kasaji Tasen Lai nunga, talisa Khristan yimsü Asia lima balalai prokshia aodang, parnok sobaliba, putipuyang, wain-shin balala amshia Yisu Osangtajung tenyartem ratettsüba angur. Khrista dak amangtsü asoshi Yihuda nunger sobaliba masü, saka pei tetsü-tobu nungi benschia aruba sobaliba tajungtemji Khrista Osangtajung tesayuba nung tüzenshir amshitsü tenyartem ajungshiba tejangja kuli angur. Anungji tetsü-tobu sobaliba tajunga sünga kenyongi tai, endoktsüla ta tangatetba ya tai lir; pei sobaliba tepsetba den saku lir.

Sobaliba melenshia/samaa aoba

Kodang sobaliba balala benschir shilu ana-asem meyoktepa alitsüsa kümdir, talisa kibalembu, shishilemba maparen balala külemi inyaktsüsa kümdir, shilu ajak nung memeteti temelenshi adokadoker alir. Saka shilu koba rongsenketsüng, shisaliok, zülumen, mozü-mora, putipuyang, technology balala nung terenlokba asür, iba shilui benschiba sobalibaji tangar telok jagi benschitsüsa akümer, tat. agi., temesüng lima rongsenketzüng maparen nung renloka aoba ajanga par sobaliba tajungba ta bilema aser ajizüka benschiba ajanga asen sobaliba amokbanga aoba, samaba angur. Tashiyim mapa aser tesayuba balala ajanga temulungsentsü aser tangatetba melenshidaktsüba ajanga sobaliba kaji melenshir/samadaksür.

(Maneni asung adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Holocaust nungi jenbur Yihuda nunger 400-i covid vaccine agi



Nazi death camp, Auschwitz nungi kümzüker Yihuda nungertem January 27, 2019 nü International Holocaust Remembrance Day nung adentsü atema Vienna-i arudang tangokba noksa nung angur.

January 30, 2021: Tang Austria nung Yihuda nunger sempaba tali bulua akümbe mapang nung 2nd World War mapang Holocaust nungi jenbur Yihuda nunger 400 dak temai coronavirus vaccine agiogo, ta osang ka ajanga metetdaksü. 2nd World War mapang Nazi Party-i Yihuda nunger jenti tepseta liasü aser iba mapang nung jenbur Yihuda nunger vaccine agirtemji timbaka arrshi küm 80 dak tema lir. Parnok ajak Vienna nung aliba Convention Center-i oa covid vaccine agiogo. Russia-i Nazi Auschwitz concentration camps nungi Yihuda nunger kümzükbä sülen küm 76 ajungba anogomong nung parnok aika ambulance aser bus nung arua coronavirus vaccine agi. Austria den kidanger Slovakia nunga Holocaust nungi jenbur Yihuda nungertema coronavirus vaccine agia liasü. Bratislava nung Yihuda nunger lenir, Tom Stern-i, "Iba ama anogomong ka nung vaccine agiba atema onok kanga pelar. Holocaust nungi jenbur nisung 128-i vaccine agiogo," ta metetdaksü. Iba dak alia kasa anogo nungsa Slovika tesem balala nung Holocaust nungi jenbur 330 dak temai coronavirus vaccine agiogo. Israel nunga arrshi küm 70 dak temapurtem shilem 80 dak temai coronavirus vaccine agi. Yaküm Israel nung Holocaust nungi jenbur nisung 900 dak tema coronavirus tashidak agi süogo.

Cuba ketdangsertemi pastor Karel Parra Rosabal chiokogo



Pastor Parra Rosabal'er kibong noksa nung angur. (File photo)

January 30, 2021: Tawa Cuba nung ketdangsertemi pastor ka pua liasü saka ketdangsertemi pa anogo 10 nü tepuokdak ayuba sülen chiokogo. Ketdangsertemi Jobabo, Las Tunas nung Pastor Karel Parra Rosabal apuba sülen anogo 10 nü tepuokdak yua liasü saka Hokolbarnü chiokogo. Pastor-i temelaba makai osettsüset aika alidena rizünger, ta tai tonglokja pa pua liasü, saka prosecutor office-i pa anema kuli mengui chiok. Jobabo nung aliba Fuego Dinámica Apostolic Arogo nung pastor Rosabal dang pai osettsüset aliba kuli kakettem sayuang ta ashi; pa chiokaka sorkari pa nem osettsüset tanaben meyipa magütsü. Pastor indang osettsüsetji timbaka pa meyong 'cycle workshop' nung amshiba osettem lir. CSW Head of Advocacy, Anna Stangl-i, "Tang Cuba nung rongsenkettsüing tensa mejungi lir. Rosabal taküm alitsü atema senotsüji iba mapa (cycle yanglushiba dokan) inyakba ajanga dang angur. Pa indang osettsüset meyipa magütsüba ajanga pai timtem ajurutsü aser par kibong memesütettsü," ta metetdaksü. Ketdangsertemi Rosabal chiok saka pa ministry mapa anendaktsütsü nükjidong nung ketdangsertemi pa meyong osettsüset meyipa magütsü, ta Stangl-isa metetdaksü. Pastor-i mapa tasen ka bushitsü atema pastor mapa toktsütsüa akok, pai yamaji meinyakra par kibong kanga timtemtsü, ta Stangl-i ashi. Cuba nung ketdangsertemi Khristan yimsü ainba nokdangtsü atema pastor tem anema inyaka aruba ya tang tasen masü.

Cuba nungbo aseni oset ka alizükra iba atemaji kulikaket alitsüla; yamaji pastor Rosabal ket nunga pa indang cycle yanglushiba dokan nung amshitsü atema alizükba osettem indang kuli kakettem liasü, ajisüaka sorkari item osettsüset bener aoba sülen pa chiokdang osetbo meyipa magütsü. Sorkar ketdangsertemi pastor kidang nungi US nunger sen 1,900 jenjang osettsüset bener oa liasü, ta CSW-i metetdaksü. Tawa Cuba nung Khristan lenirtemi Communist sorkar dang Pastor Rosabal tangsa chiokang, ta takhangba agüja liasü. Pastor Rosabal ya register masüba Arogo nung pastor inyaker ibayongji sorkari January ita tomle Jobabo jila nung pa pua liasü. Police-i pastor Rosabal'er ki mita bushiba sülen pa dang, nai kuli kaket makai osettsüset aika alizükogo, ta ashi. Cuba nung Apostolic movement kübok Arogo aika lir, ajisüaka Cuba nung Castro-i aniba sorkari iba denomination ya ozüing alema, ta sangdonga tamangba yimsü telok nung register mesüdaktsür, ibayongji sorkari pastor anema inyak, ta bilemer. 1992 küm Cuba linük temzüng nung Cuba linük ya Tsüngrem dak mamangba linük ka masü saka secular linük ka lir, ta sangdonga liasü.

ANOGO ABEN TSÜNGREM DEN

Temelentep taküm

Galatia 2:20

Khristan takümji temelentep taküm ka lir. Ne taküm asoshi Yisu taküm. Kodang Yisui ne taküm azüokdir, nai majangshidangba taküm ne takümi ajangshitsü. Kodang na tashi mait lir Khristai ne taküm nung Pa tashi sayutsü (2 Kor. 12:9-10). Kodang nai mangatettsüsa tia arudir, nai tasüngdang dang asüngdangang aser Pai ne nem shisatsü agütsütsü (Yakob 1:5). Kodang meimchiri makoktsüsa tia arudir, Tsüngremi tamakoktsüji inyaker (Luke 18:27). Kodang nai sempaba nisung den ajuruteper, na ajanga Tsüngremi Pa mejembitetba temeim sayur (1 Yn. 4:7).

Kodang nai tangar asoshi sarasademtsütsüsa akümer Tanela ne dang sarasademtsü sayu (Rom 8:16). Kodang tamang ka taküm nung Khrista lidir, iba nübu dak Tsüngrem tenangzükbä ajak ataloktsü (Ef. 3:19).

Tsüngremi ne taküm azüoker aser ibaji kechi akümtsü aji metettsübaji tesüngmangtsü nüji. Kechi akümtsü ta shisabulua alitsü dang nungi maneni ne taküm ajunga Tsüngremi azüokdaksütsübaji tayongzükbä tulu lir. Tsüngremi inyaktsü akokba mapai ne sasa inyaktsü merangbaji tatitang ka lir. Asenok mapaji tezü dak tangloka alitsüba aser asenok dak inyaktsü aser asenok ajanga tangar dang Tsüngremi inyaktsü melaba (Yn. 15:5). Tsüngremji dang Tsüngrem asütsü akok. Na ajanga Tsüngrem taküm sayutsü melaang. Pai dang inyaktsü akok.

Nepal ketdangsertemi Rupantaran Khristiya Tenla ki raksatsü

January 30, 2021: January 20, 2021 nü Nepal nung sorkar ketdangsertemi hadir balala bener arua Rupantaran Khristiya Arogo Tenla ki raksatsüogo, ta International Christian Concern (ICC) osang ajanga metetdaksü. January 20 nü Naya Basti slum area nung aliba Khristan kibong aika adenshia ketdangsertemi Tenla ki anüka tepsatsübaji nüktzü alua repranga liasü. Iba Arogo nung tongti pastor, Prem Rokka-a par Arogo Tenla ki raksatsübaji melung zürepa repranga liasü. Arogo Tenla ki yanglutsü atema Khristan kibong kati tenla agütsüba sülen 2013 küm slum area nungji iba Arogo Tenla ki yanglua liasü. Osang angazükba agi, ketdangsertemi pastor aser deacon tem dang Tenla kidang nungi osettsüset agizüktsü atema minute 5 dang agüja liasü. Ajisüaka pastor den deacon temi ketdangsertem dang, osettsüset agizüktsü atema minute 5 ji mapang kanga tatsü ta shia mapang tali meshisem ajisüaka ketdangsertemi parnoki mepishiba mangai Tenla ki tepsatsü. Sorkari public schools yanglutsü atema slum area nung iba liji agüja liasü. Sorkari iba project tenzükbä sülen slum area nungi Arogo dang masü saka kibonga aikatia iba area toktsüogo. Tamalen sorkar telemtetba anema Arogo lenirtemi nokdakba sülen sorkari Tenla kiji tanga tesem kati mebelen tashi school ki project metenzüki alitsü tuyua liasü. Iba sülen Tenla ki mebeleni lia ketdangsertemi Tenla ki tepsatsüogo. UN General Assembly (UNGA)-i alima tesem balala nung Tenla kitem aser tamangba yimsü dak sendakba kiojentem raksatsüba tatalokbatem aitsüba mapang ka nung Nepal nunga Tenla ki raksatsür. January 20, 2021 nü Tenla ki raksatsüba sülen nungibo Arogo züngsemtemi ki balala nung adenshia tekülem sentong agia arudar. International Christian Concern-i iba tatalokba maneni mita reprangdar, ta parnokisa metetdaksü.

OLONG PAITEP # 5710

	1		2							3
4					5		6			
7										
			8						9	
10								11		
							12			
13							14			
15										

TIPIEN

1. Taochi sayuba - 10
4. Temezüng agi kongshi - 4
5. Ainer - 6
7. Chiyungnū - 3
8. Mi nung atsük - 5
11. Asen masü - 3
13. Lenmang ajurutepdak - 6
14. Yangi masü - 4
15. _ _ _ _ _ jang - 6

LANGTSÜNGLEN

1. Menungra - 6
2. Mi tsükloker mesepba - 4
3. Sūngo o tzu ajemba - 5
5. Temenemtsü tajung - 7
6. Idak - 4
8. _ _ _ _ ok - 4
9. Tebangi apuba kongki tapu ka - 6
10. Tashi endokba metet - 5
12. Tzü manung senzüba - 4

OLONG PAITEP # 5709 TELANGZÜBA

TIPIEN :

1. Yimlibilem, 4. Anak, 5. Tangar,
7. Aya, 8. Arong, 11. Par,
13. Lemjem, 14. Oagi, 15. Mulung.

LANGTSÜNGLEN :

1. Yongya, 2. Moko, 3. Marok,
5. Teronem, 6. Nung, 8. Amajok,
9. Jangzü, 10. belem, 12. Rong.

KOMA SÜLA TELANGZÜBA

Q. Nagaland nung ya Assembly constituency 40 dang aküm nunga süla ?

Tamajung aika nungi kümzüksü aser kinunger kidanger putepa litettsü.

-SMS

Asenok Nagaland nung Constituency 40 dang kümtsü nungbo tangar kin masü asenok Aorsa akoksatsü. Aser asenok Constituency raktep dang telok O telok na tsüngda kanga meputep atentsü ta bilemer.

-T.AO M KG.

Nagaland nung ya Assembly constituency 40 dang aküm nunga koma süla ? Olong 29 shi nung January 22, 2021 tashi nung yokang ta January 26 adok nung adokba ya reverse century nung aliba agi asü koda? Assembly ji küla 40 saka 60 saka 80 saka sen kodasür timba achitsü ta toktepba ali tashi NAGALAND ya majungtsüsa.

-SMS

Assemblyji bo 40, 60, mesüra 80 ta asüyonga sen kodaser timba achitsü ta toktepba ali tashi NAGALAND ya majungtsüsa.

-SMS

TANÜBO NAI LANGZÜANG

Q. SIMBEX ya India aser _____ tsüngda lir.

- A. France B. USA C. Singapore D. China

===== (Taruba adok nung onoki langzünsü)

YASHI ADOK TELANGZÜBA : January 2000

NAI-A YA METETTER MA?

JANUARY 2021 NUNG SAYABA KENSEP KAR:

- * Bun B and Le\$, Distant
- * Uncle Murda, Don't Come Outside Vol. 3
- * Key! and Tony Seltzer, The Alpha Jerk
- * Johnny Cinco, North
- * Griselda and BSF, Conflicted (Original Motion Picture Soundtrack)
- * Smoke DZA, Nym Lo & Jayy Grams, R.F.C (Money Is the Motive)
- * UnoTheActivist, Unoverse
- * Nyck Caution, Anywhere But Here
- * Fredo Bang, In the Name of Gee (Still Most Hated)
- * DVSN, Amusing Her Feelings
- * Taylor J, Still Ballin
- * Kota The Friend, Lyrics to Go Vol. 2
- * Peewee Longway, Longway Sinatra 2
- * G Perico, Welcome to the Land
- * Th1rt3en, A Magnificent Day For an Exorcism
- * Erick the Architect, Future Proof
- * BRS Kash, Kash Only
- * Young Dolph, Rich Sex
- * The Alchemist, Carry the Fire
- * Madlib, Sound Ancestor
- * Rich The Kid, Lucky 7
- * Lil Durk< The Voice Deluxe
- * partynextdoor-colours

SUDOKU # 5751

TELANGZUBA # 5750

4	7				1		3	3	4	2	5	7	6	9	1	8
				9			6	1	7	6	9	8	4	3	2	5
9		5	1		6	8		5	8	9	2	1	3	7	6	4
7	9					1	4	2	3	7	6	5	8	1	4	9
	5		8		9	6	2	6	5	8	1	4	9	2	3	7
6	2		4			5	8	9	1	4	7	3	2	8	5	6
		2			5		3	1	4	9	5	8	2	1	6	7
5			3	7				8	7	6	1	3	9	5	4	8
3			2		4	9	6	5	8	2	3	4	6	7	5	9

OJANG LUTEP # 5298

JUTANG	:						
JAAC	:						
EPI	:						
NDAING	:						
MAKÜ	:						
ZÜPENR	:						
KATE	:						
ZÜTANG	:						
DANKIGI	:						
ANGSHIL	:						

OJANG LUTEP TELANGZÜBA # 5297

YONGPAK KA NUNG YONGSHILU AIKA ALUYONGJIA
YONGKÜPBO KA DANG ALIR

TAN HOPTA ATEMA - KOMA SÜLA ?

Q. Nagaland nung COVID-19 vaccine ya taginür ajak nem angati agütsü nunga koma süla ?

Olong 20 shi nung February 05, 2021 tashi nung iba telangzüba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.



New Delhi, Aenjeti/January 30, 2021: Mahatma Gandhi asüba anogomong nung Honibarnü Rajghat, New Delhi nung Ato kilonser, Narendra Modi-i Mahatma Gandhi nem akhüm agütsüba noksa nung angur.

Centre-i aluyimertem matsüngdang benokba onük kasa dang lir: PM

New Delhi, January 30 (Agencies): Honibarnü yimtenren party ajak senden nung jembidang Ato kilonser, Narendra Modi-i, aluyimba dak sendakba ozüing tasen asem onük nung Centre sorkari aluyimertem matsüngdang benokba onük kasa dang lir, ta metetdaksü.

Party ajak senden nung Modi-i, aluyimertemi longkak aitba onük bentettsü atema sorkari maneni ken o jembitsü meranger, ta ashi.

Iba senden ya Modi menden ser amen aser senden nung Defence Minister Rajnath Singh aser Parliamentary Affairs Minister Prahlad Joshi nata densema liasü.

Osangbenertem den jembidang Prahlad Joshi-i, "Ato kilonseri, Centre sorkari sadoksadoka aluyimertem tebilemtsü onük bentettsü atema jembir ta shiogo," ta metetdaksü.

Joshi-isa, "Ato kilonseri, Centre sorkari January 22 nü benokba onük nung maneni masetshir ta shiogo; iba anogoji sorkar aser aluyimertem na tatebangbuba senden amenba anogo lir. Iba anogo nungji Centre sorkar tenüing nung Agriculture Minister-i aluyimba ozüing dak sendakba nung benokba onük tang tashi kasa dang lir ta shiogo. Tomar (Agriculture Minister)-i jembiba o lephsia Modi-i, pa (Narendra Singh Tomar) den ken o jembitsü atema pa renema dang lir ta shiogo," ta metetdaksü.

Parliament tiptema agitetsü atema party ajak dang mepishia Modi-i, Parliament nung rongrong adokba ajanga party tilatem taliba timtemer, kechiyong parnoki tebilemba lemsateptsü atema maongka mangur, ta metetdaksü.

Modi-i jembiba o metetdakja Joshi-i, "Parliament

junga agitetsü atema party tulutemi inyaksüla. Senden nung rongrong madokra party tilatemia Parliament nung parnok tebilemba onüktem lemsatepteter," ta ashi.

Senden nungsa Ato kilonseri California (US) nung Mahatma Gandhi indang kürakyanglu raksatsüba tatalokba aitsüogo, ta parliamentary affairs minister-isa ashi.

Senden nung Congress nungi Ghulam Nabi Azad, Trinamool Congress nungi Sudip Bandyopadhyay, Shiromani Akali Dal nungi Balwinder Singh Bhunder aser Shiv Sena nungi Vinayak Raut nunger densema opposition party balala nungi lenirtemia aluyimertemi longkak aitba tebilemtsü onük benoka liasü.

Tongti opposition party ajaki sorkar dang Parliament nung aluyimertem longkak aitba onük benoka o lemteptsü mepishia liasü.

Aluyimertem longkak aitba tesem nung internet service anentsür

New Delhi, January 30 (Agencies): Honibarnep-a Ghazipur arrtsülen longkak aiterem aika adenshiogo; Mahatma Gandhi asüba anogomong nung aluyimer unions balalai lumia mongogo.

Ano külen Ministry of Home Affairs-i, January 31 aonung 11:00 ako tashi sorkari Singhu, Ghazipur aser Tikri arrtsülen aser temeküt tesemtem nung internet services khenpiga atema anentsür, ta sangdong.

Centre sorkari benokba aluyimba ozüing tasen asem anema longkak aiter aluyimertem pusema Honibarnüa aluyimertem aika Delhi arrtsülen adenshiogo.

Osangbener den jembidang BKU Meerut Zone Tir, Pawan Khatana-i, Centre anema longkak aitba tashi taitba kümdar, ta metetdaksü.

Khatana-i, "Iba ya yimtenren tsütsü longkak aiter masü. BKU aser Rakesh Tikait pusemertem ajak onoki pelaa agizüker, ajisüaka longkak aitba metembang tashi shilem agitsüpurtem ang arutsüla," ta metetdaksü.

Honibar aonung BKU office ketdangpurtemi ashiba agi, Honibarnü Ghazipur arrtsülen nisung 10,000 shi adenshi, ta metetdaksü, ajisüaka Ghaziabad police-ibo nisung 5000-6000 shi dang adenshi ta

metetdaksü.

Aluyimertem longkak aitba tesem nung Provincial Armed Constabulary (PAC), Rapid Action Force (RAF) aser police aika liasü.

Aluyimertem lenir, Abhimanyu Kohar-i, longkak aitba tesashiba akümtsü, kechiyong taruba anogo ishika tsüingda ano aluyimer meyrjang aika adenshitsü, ta metetdaksü.

Hokolbarnü osangbenertem senden ka nung jembidang aluyimer unions nungi lenirtemi, aluyimertemi tesünap nung longkak aiter, ajisüaka Centre nung BJP sorkari ibaji nokdangtsü meranger, ta aija liasü.

Parnoki ashiba agi, Brihostibar aonung police-i aluyimer lenir Rakesh Tikait, Ghazipur arrtsü nungi mindoktsü merangba sülen nungi Ghazipur, Singhu aser Tikri arrtsütem nung ano aluyimertem timba adenshiogo.

Aluyimertemi Farmers' Produce Trade and Commerce (Promotion and Facilitation) Act, 2020, Farmers (Empowerment and Protection) Agreement on Price Assurance & Farm Services Act, 2020 aser Essential Commodities (Amendment) Act, 2020 ozüingtem agentsü takhangba agüja yaküm November ita nungi tenzüka Delhi arrtsülen longkak aiter.

India Tiri anogo asemnü Polio vaccine programme tenzüksüogo



New Delhi, January 30, 2021: Honibarnü Rashtrapati Bhavan, New Delhi nung linük Tir, Ram Nath Kovind-i Pulse Polio Programme 2021 tenzüka tanur ka nem Polio drops agütsüba noksa nung angur.

New Delhi, January 30 (Agencies): January 30 nungi tenzüka February 2, 2021 tashi anogo asemnü India linük nung Polio vaccination agitsü.

National Polio Immunisation programme ya January 17 nü tenzüksü sentong liasü, ajisüaka January 16 nungi Coronavirus vaccination tenzüka agi polio vaccination anogo atsülanga liasü.

"Linük nung Covid-19 vaccination January 16 nü tenzüksü aliba agi Ministry of Health & Family Welfare-i India Tir den jembitepa Polio vaccination ji January 30, 2021 nungidang tenzüksü lemteta liasü," ta sorkari tamalen metetdakja liasü.

Honibarnü linük Tir, Ram Nath

Kovind-i Polio National Immunisation programme tenzüka anüingdang 11:45 aonung Rashtrapati Bhawan nung tanur kar nem polio drops agütsüogo.

Polio drops ya kinü tanur nungi arrshi küm 5 tanurtem nem agütsütsü aser polio ya February 2 tashi agütsütsü, ta sorkari metetdaksü.

Polio vaccination mapang nung Covid-19 protocol aser telatetbatem benshitsü. Mask agitsüla, tangar anasa maotsüla aser teka metsüksüla.

Coronavirus wara aliba mapang nung polio vaccination agir, anungji kanga teintet senosotemi pei chir mesüra semchirtem meina immunisation camps-i marutsüla, ta sorkari metetdaksü.



Bengaluru, January 30, 2021: Honibarnü Mahatma Gandhi asüba anogomong nung Bengaluru nung Congress lenir, S Siddaramaiah aser aluyimer lenirtem-Kodihalli Chandrashekar, Nagendra aser tangartemi iba anogomong nüngtem nung lumiba noksa nung angur.

January 30, 2021:
Walter Reed National
Military Medical
Center nung yirur aliba
sepaitem semdangi
aotsü atem Marine
One-i atuba mapang Tir
Joe Biden-i kinungtsü
first lady Jill Biden dak
teping mesepba noksa
nung angur.



Onoki temzüng ozüing kümzüka ayutsü: Myanmar Military

Yangon, Aenjeti/January 30 (Agencies): Myanmar military-i Honibarnü, parnoki temzüng ozüing sülen anidaktsü, kümzüka ayutsü aser ozüing dak ajemdaker inyaksangshitsü ta shiogo. Military-i tanaben linük yimsüsüba amokbangtsü akok, ta tebilemtsü kaa bilemba agintsütsü atema parnoki iba olen lemsatep.

United Nations Secretary-General Antonio Guterres aser Myanmar nung Western embassies temi Myanmar nung Army-i tanaben yimsüsüba amokbangtsü merangtsü akok, ta tebilemtsü kaa bilemba lemsatepba sülen anogo ka lir iba olen lemsatepogo. 1962 küm coup asüba sülen military-i Myanmar küm 49 yimsüsügo.

Military koba dang Tatmadaw ta ajar, parnoki ashiba agi, tawa commander-in-chief, Senior General Min Aung Hlaing-i constitution agintsüba indang jembiba ya mashiyimi angatetba lir.

"Tatmadaw-i 2008 constitution kümzüka arudar aser ozüing kübok inyaksangshitsü. Lokti tentet kar aser media-i parnoki bilemnüba bilema Tatmadaw-i constitution agintsü ta zülü," ta parnoki ashi.

Aung San Suu Kyi-i aniba National League for Democracy Party (NLD), kobai November ita election kokogo, parnoki military-i lemsatepba olen ya rasaa ashitsü tapet, ta shiogo.

NLD otongdar Myo Nyunt-i, Reuters dang ashiba agi, party-i military ya election dak sendakba nung nüburtem tejangraba agizüktetba lokti tentet ka südaktsüner.

Iba hopta military otongdari coup dak sendakba nung telangzüba agütsütsü memulungba den vote agütsüba nung ochi mashi inyakyim aliba atema parnoki ashishiba mebentettsüra military-i jenjang tapet agitsü akok, ta ashiba sülen yimden yimsüsüba tsütsü

mesüingjemteti aküm.

Military-i vote agütsüba nung ochi mashi lir ta aitsüba Myanmar election commission-i Brehostibarnü magizük aser ashiba agi, vote jenjang melenshitsu aibeln tulu kecha menaa mali.

NLD-i menden shilem 83 akokba election nung aibelen lir ta army-i shia aruogo aser iba ajanga civilian sorkar aser military na atsütepa arudar.

Constitution-i parliament nung military nem menden shilem 25 mekazüka tokja lir aser Suu Kyi indang administration nung ministry tongtumbang asem parnoki abener.

Military chief Min Aung Hlaing-i, Bodhbarnü military personnel tem dang constitution sülen manidakra aji agintsüla ta ashiba ajanga coup asütsü tetsüba aiddaktsü.

Honibarnü military-i ashiba agi, pai iba olen ya constitution jenjang angatetdaksütsü atema ashiba lir.

UAE-i bendangertem nem lisopur jenjang agütsütsü

Abu Dhabi, Aenjeti/January 30 (Agencies): Bendangertem nem lisopur jenjang agütsütsü atema sentong aliba United Arab Emirates-i Honibarnü sangdongogo. Coronavirus wara pokteter aliba mapang rongsenketsüng jenjang yanglushitsü atema merangba nung shilem ka ama iba telemtetba agiogo.

UAE-i taoba mapang Palestinian nunger aser 1971 küm linük sorkar kümtetba nung teyari agütsürtem nem lisopur jenjang agüja liasü. Iba sülen tangar nema iba jenjang agüja aruogo.

Dubai yimsüsür Sheikh Mohammed bin Rashid Al Maktoum, shiba linük Ato Kilonser aser tatong tir lir pai Honibarnü, iba maongka ya artist, author, doctor, engineer aser scientist tem aser parnok kinungertem nem agütsütsü, ta ashi

Sheikh Mohammed-i Twitter ajanga, linük nung emirates yimsüsür teneti aser federal jenjang nung lisopur jenjang atema nisungtem nominate asütsü. Lisopur jenjang angurtemi par linük indang lisopur jenajanga yutettsü, ta ashi

Lispour atema lokti senden

balala lateta aliba nung shilem agitsü atema iba lisopur jenjang ajanga temeden agütsütsü magütsütsü, iba indang osang mejangjai lir.

UAE nung nüstünyongsük million 9 dak tema lir saka lisopurtembo shilem ter dang lir. November ita UAE-i, linük indang Islamic personal laws melenshitsu sentong aliba sangdong aser iba ajanga kibong mekümi alir tetsür aser teburtem külemi alitsü atema temelaba agütsütsü, yijemba nung tenokdangba agütsür aliba salatsütsü aser pei meraket atema nisung tepsetertem aitsütsü.




January 30, 2021: Tripoli, Lebanon nung coronavirus ajanga tenokdangba tesashi agütsüba aser taküm libaliro tamajungba küma aoba anema longkak aitba mapang Lebanese sepaitemi longkak aiterem dak tear gas aser rubber bullets khaloktsüba noksa nung angur.

Sür küm ka ajungba Menungra Bilemteter

Asür. I. Longtichang (Dibuia) 31.01.2020

Ochishirbo teti tatem maka bilemteta alitsü," Tenüingsang ken 112: 6



Nü taküm temaotsüba ka asü
Nai ajangtetbatem menungra bilemtetba ya senti
Na tepang agi rasaa ashitsü mekoki meimer
Aser kanga menunrar.

- Temeim, Chirnur, Anükapang aser Semchirtem

Joint Declaration ajanga Britian nem temeden magütsü: Cheng

Hong Kong, Aenjeti/January 30 (Agencies): Hong Kong Secretary of Justice Teresa Cheng-i Honibarnü, joint declaration kübok yimti nung Britain temden kecha mali ta shiogo. Iba sangdong ajanga 1997 küm China nem bendanga agütsüba sülen Hong Kong koda yimsü asütsü iba indang shia lir.

Britain nung küm pongu alitsü, azüngtsü aser mapa inyaksü aser iba sülen lisopur jenjang atema apply asütsü asoshi Hong Kong nunger shirnok ket nung British National Overseas (BNO) passport bona lir parnok nem temelaba agütsütsü atema UK indang visa application program melenshitsu anogo ka lia Cheng-i iba olen lemsatep.

BNO jenjang ya Britain-i Hong Kong nung alirtem atema mejeta 1987 küm yanglutsüba lir. Taoba mapang Hong Kong

nung China indang Ministry of Foreign Affairs Commissioner Xie Feng-i ashiba olen lepshia Cheng-i, "Joint Declaration kübok Hong Kong China nem bendanga agütsüba sülen Hong Kong achaayangtsü, atema UK ket nung sovereignty, jurisdiction mesera temeden kecha mali," ta ashi.

Taoba küm June ita Beijing-i Hong Kong nung national security law benokba sülen Britain-i, BNO passport atema temsüa alir Hong Kong nunger million 3 nem January 31 nü nungi tenzüka tejenokdak agütsütsü atema jenjang agitsüsa aküm.

Visa melenshiba dak sendakba nung China aser Hong Kong sorkari UK aitsüogo aser ashiba agi, January 31 nü nungi tenzüka BNO passport ya senzüsenpongtsü atema kuli kaket tape ta parnoki mezüngshitsü.

Aluyimba ajungkettsü atema Pak nem China-i teyari agütsütsü: PM Khan

Islamabad, Aenjeti/January 30 (Agencies): China-Pakistan Economic Corridor (CPEC) sentong kübok aluyimba ajungkettsü atema China-i teyari agütsütsü imlar, ta Pakistan Ato Kilonser Imran Khan-i ashi.

Pakistan sorkar aser China na senteper, tsünüsenpongtsü tali adokdaksütsü, irrigation system modernize asütsü jenjang bendenloksü atema CPEC kübok aluyimba tasatem angazükdar.

"China nung tsünüsenpongtsü aser dairy product tem Pakistan dang nungi kanga agi timba adokdaksür, aser aji parnok bushitsüngdang aser technology kanga tejakdangi orr aliba ajanga lir," ta Ato Kilonser-i ashi.

Paisa, sorkari linük yimjiyimjung atema agro-based industries tem ajungkettsü asoshi jenjang tapet agidar, aser iba dak sendakba nung China-i Pakistan nem teyari agütsütsü mulunga lir.



Imran Khan (File photo)

Aluyimba ya Pakistan rongsenketsüng atema inyakyim tongtumbangtiba lir, aser China-i teyari agütsüba ajanga agricultural modernization nung tapak tasen ka lapoka, Pakistan nungertem tarutsü melenshitsu asoshi inyakyim ka asütsü, ta pai ashi.

Mongolbarnü China aser Pakistan na senteper, aluyimba nung aser industrial cooperation ajanga takok angubattem indang osang bendena lemsateptsü atema online nung sabang ka tentetogo, koba CPEC kübok tensendaktep akangshitsü nükjidadong nung amenokba lir.

Pelaba Lemsateper

"Shirnoki nüktzü yima proker, tepela nung arutsü."



YANGER IMCHEN

5th April 1960 - 26th January 2021

Onoki teti meima aliba asür YANGER IMCHEN, pa shiranga aliba mapang aser January 26, 2021 anogo pa iba akümüli nungi pila orr onok mangyim jashi nung alidang, kija, tentet balala aser Arogo balalai nübo, shisatsü, tanela aser rongsen agi onok nungita yariogo, nenok ajak dang kinüngertemi pelaba lemsateper. Ozü mangyim jashi nung alidang kiyongertem, medemertem, kinüngertem aser temeimer kwinakati ozü dang temeim sayua lenla balala ajanga onok mulung süneptsüogo, nenok temeim mapa atema kinüngertemi pelaba shisemer.

Onoki item dang alakteta pelaba shisemer:

- | | |
|---|--------------------------------------|
| 1. Shri Imkong L Imchen Hon'ble MLA | 12. Zangna SHG, Dimapur |
| 2. Shri Tarep Imchen Addl. Secretary, Works & Housing, Mission Director, NBDA | 13. MS, DHD and Staffs |
| 3. Er. Imsenkaba, Executive Engineer, Power Department, Dimapur | 14. Ao Nurses Telongjem, Dimapur |
| 4. Er. Moameren, Executive Engineer, Power Department, Mokochung | 15. The TNAI, Dimapur |
| 5. Shri Temsu Longkumer, Accounts Officer, Tribal Affairs Dept. Kohima | 16. ANM Association, Dimapur |
| 6. Rtd. Chief Engineer K Tongpang Lkr & Family | 17. Longkhüm Senso Telongjem Dimapur |
| 7. Mrs & Mr Meyionen Jamir & Family IGP & Director Nagaland Lokayukta Police. | 18. Longkhüm Village Council |
| 8. Mrs. Imtinaro, Mekuli, Mokochung | 19. Landmark Colony Council, Dimapur |
| 9. Mr. Sanjay & Mr Amit, Medicine Distributor, Dimapur | 20. Imchen Kidong Mungdang |
| 10. Penlisen SHG, Longkhüm | 21. NPF Dimapur Division |
| 11. Mesayashi Co-Operative Society, Dimapur | 22. NPF Dimapur 2-A/C |
| | 23. Former DMC Members |
| | 24. Dimapur Ao Baptist Arogo |
| | 25. NCRC Ao Dimapur |
| | 26. ACRC Youth Fellowship Dimapur |
| | 27. Longkhüm Baptist Church |
| | 28. NCRC, Longkhüm |

Nenok kija shia tenüng teta ozüi pelar ta meshitetba atema sasa bilemer, saka nenoki temeim mapa sayua aser ozü dang keta asenba atema onoki kanga dang pelar. Tulusang Tsüngremi nenok mapa tajung asoshi molamushia moajangma ta ozüi sarasademtsür.

- Temeim Kinungtsü, Chirmurtem aser Kinüngertem

MULUNG NEN O

Onoki kanga meima aliba ajemalu tebu **AKANGTOSHI** (Daniel Longsa) shirang yipten nung aliba mapang nungi tenzüker pa asünü (18/01/2021) tashi yimer yimsanger, kidang kiyonger, pur medemer, Arogo aser lokti balala, kija aser kibong kwinakati tamang sarasadem den nübu aser rongsen agi yariogo ajak dang kanga pelaba lemsateper.

Ajak dangi tsüngtong arua meshitet nung iba osang kakat ajanga kanga pelaba maneni lemsateper. Tsüngremi nenok ajak nem lepa moajang ta ozü tamang sarasadem.


- Temeim Kinungtsü, Jabasotem, Semchir, Anükapang & Kinüngertem.



04-04-1968~ 18-01-2021

SÜR KÜM KA AJUNGER

TASOBA:
06 JUNE 2000



TASÜBA:
31 January 2020

Mangli sangwali ta anogotem asemjena aor, saka ne temeim onoki kodanga mamateter.

Onoki teti meima aliba jala **LONGTISENLA** (Chuchuyimlang), ajungbena dang iba lima nungi pilar tanü küm ka abensadang onoki na kanga menungra mulung züreper. Saka ya tiar sentong, aser na teti tepeladak Kotak nung lir ta angateta onok mulung sünepa den na asüba anogo onoki sarasadema bilemteter.

- Temeim tsürabur, adianu, anükapang aser kinüngertem.

TENÜNGSANG AGÜTSÜR

Tepela aser konang takok angur **SHRI. IMNASOWA KICHU**, 26th Jan. 2021 anogo Sorkar tenzükba mapa nung Governor Award Commendation Certificate 2021, ngutetba asoshi ozü Late. Jongpongshilu Mokochung Village, kinüngertem ajanga tetushi konang tepela lemsateper. Tarutsü nunga ne mapa aser wadang ano maneni ajungketa inyaksü onok sarasadem aser teimla.



Principal Director Dr. Vizolie-i State-Warehouse semzüksü



Dimapur, Aenjeti/January 30, 2021 (TYO): Honibar (30.01.2021) anepdang 11:00 ako meta Principal Director Dr. Vizolie Z. Suokhrie-i (Directorate of Health & Family Welfare) DH&FW indang State-Warehouse semzüksüogo, ta sangdong ka ajanga metetdaksü. Iba State-Warehouse lapokba sentong nung Dr. Kevichusa Medikhru, Mission Director NHM menden liasü aser pai okila jembidang, iba Warehouse ya latettsüba ama ita asem nung takok ngua renemtet ta ashi aser warehouse maparen takok ngua renemtsü nükla yur bendanga agüja inyakba atema, pai ketdangsür ajak nem tenüngsang

agütsü.

Iba sentong tenzüka, Dr. Khriezotou Paphino, DDO-i sarasadem.

Iba State-Warehouse ya Nagaland Health Project (NHP) kübok yanglua liasü. WHO indang standard (jenjang) ajangzüktettsü/ meneptsü nükjidong yur State aser District level nung storage facility tem tajungba küma yanglushitsü asoshi NHP-i iba Warehouse yanglutsü mulungtet.

Iba warehouse atema 2019 March 5 nü tesem renemtet aser ground work tenzüker aser 2019 October 19 nü iba maparen renem. Iba warehouse atema 2020 November 21 nü nungi pre-fabricated osettem inok tenzüker aser

2021 January 27 nü renemtet.

Mopung sadema senzüdaksütsü aser ventilation atema iba warehouse nung turbo vent 8 inoktsüogo. Iba warehouse nung Mezzanine floor indang level ka inoktsüogo, koba ajanga storage tesem square feet 2304 agi uludaksür.

Iba warehouse ajanga health department indang medical supply tem peria rizünga yutettsü asoshi takdang sadema adoktsütsü aser central depot ama achaayangtetsü.

Maneni, iba warehouse atema, project ajanga heavy duty palletise racking system aser forklift tem alia amenoktsü sentong lir, ta kasa sangdong ajanga metetdaksü.

AR-i 'National Girl Child Week' sentong ayongzüker

Dimapur, Aenjeti/January 30, 2021 (TYO): HQ IGAR (North) kübok Assam Rifles indang Zunheboto Battalion-i National Girl Child Week ayongzüker. Iba sentong ya January 21 nungi January 26, 2021 tashi agiogo.

Hopta ka piyong ayonga agiba sentong nung, Art and Craft competition, "Girl Child Week", "Beti Bachao - Beti Padhao Abhiyan" nung lecture sentong,

Awareness Campaign, Women Empowerment aser Signature Campaign den "Girl Child Rights" atema Oath Ceremony tem Assam Rifles Public School, Zunheboto nung agiogo.

Tetsürtemi lokti nung timtem ajuruba, talisa kakat shisatsü bushiba wadang nung maongka tajung magütsüba aser tanga maparen balala nung parnok mezüngokba dak sendakba nung nüburtem tali kümdangshia

lidaktsütsü nükjidong nung Assam Rifles-i Girl Child Week sentong ya ayongzüker.

Iba sentong nung kaketshirtem indang tsürabur aser Kinunger tem jangrabangra aruagi denogo aser Girl Child Day anogomung nüngtem nung tetsür tanurtem atema alakteta sentong tajung ayongzüksüba asoshi tsürabur aser kinunger temi Assam Rifles dang kangasa pelaba metetdaksüogo.

Office of the Longmisa Senso Mungdang

B.P.O. Longmisa: P.O. Mokochung, Nagaland

TENÜNGSANG AGÜTSÜR

Longmisa Senso Mungdang ajanga Shri. Longkumonen Pongen, S.I, S.P Office Wokha, pei tenzükba wadang nung tajungtiba tenzükba ajiteta 26th January, 2021 anogo District Level Award Certificate anguba asoshi tenüngsang tetushi agütsür.

Maneni tarutsü anogotem nübur tenzükba wadang nung Tsüngremi anema aliba den arishi talang moajang ta Mungdang sarasadem.

Sd/-
Satemkaba, Mendenduba

Sd/-
Alemchuba, Tongti Zülur

Aizawl nungi Assam Rifles teseptem belentsü: Zoramthanga

Aizawl, January 30 (Agencies): Aizawl nung Assam Rifles teseptem kobi melii tangaleni belentsü ta Mizoram chief minister Zoramthanga-i metetdaksü.

Assam Rifles ketdangpurtem dang parnok indang teseptem Aizawl nungi Zokhawsang-i belentsü atema shiogo. Taküm February ita tsüngda iba tesem jagi belentsü, ta Zoramthanga-i ashi.

State ali nung amenoka aliba armed force ajak tanga tesemtemi belentsü, ta paisha ashi.

"Iba onük atema ni Prime

Minister Narendra Modi aser Union home minister Amit Shah na den ajurutepogo," ta chief minister-isa shisem.

Mizoram nung Assam Rifles battalions asem amenoka lir.

Lunglei nung 1st Assam Rifles, Serchhip nung 8th Assam Rifles aser Aizawl kübok Zodin o Khatla nung 46 Assam Rifles teseptem lir.

February 19, 2019 nü Union home ministry-i Assam Rifles dang Aizawl nungi kilometer 15 shi pilar aliba Zokhawsang-i teseptem belentsü tetuyuba agüja liasü.

Stokes, Archer aser Burns nunger training agi tenzükogo



Chennai, Aenjeti/January 30, 2021 (Agencies): England cricket squad nung züngsemtem anogo trok hard quarantine tembanger aser kasa mapang külem züngsemtem COVID-19 Test tanabuba ajanteter sülen, Honibarnü Chepauk tesem nung all-rounder Ben Stokes, pacer Jofra Archer aser reserve opener Rory Burns nunger mezüng training session nung shilem agi tenzükogo.

Asayar asempronlga ya Sri Lanka Test series nung mezüngok, koba workload

management atema Stokes aser Archer naprongla anisüngzükdaksü, kasa mapang Burns-a mezüngbuba tanur asotsü aliba ajanga iba tour nung shilem magitet.

England squad dang nungibo Stokes, Archer aser Burns nunger jelia India tonga aru aser par asempronlga RT-PCR test tasembuba ajanteter sülen, Honibarnü net nung practice asütsü atema temalaba agüsügo.

"Asayar mezüng telok - Archer, Burns aser Stokes nunger anogo asem tashi

anepongi practice asütsü. Parnok training agitsü asoshi ghonda ana latetsüoggo," ta England indang media manager Danny Reuben-i metetdaksü.

"Par asem dak alaka, yashi (Hokolbarnü) England squad ajunga PCR COVID-19 test tanabuba agiogo. Iba mapang, asayar ka danga Covid-19 tashidak meputet," ta pai shisem.

Maneni, February 05, 2021 nü nungi India aser England na iba series metenzükdang, England squad ajunga February 2, 2021 nungi training agi tenzüktsü terenemba lir.

Ranji melen Vijay Hazare Trophy asayatsü: BCCI

New Delhi, Aenjeti/January 30, 2021 (Agencies): State Unit timba kati Vijay Hazare Trophy asayamung asayatsü asoshi bangjemtepba asadanga, BCCI-i taküm parnok indang premier first-class domestic tournament - Ranji Trophy asayamung mayongzüktsü, koba küm 87 nung tan iba asayamung magiba ya mezüngalitsü.

BCCI-isa Vinoo Mankad Trophy atema U-19 National One Day asayamung aser Women's national 50-over tournament anaprongla ayongzüktsü, ta tezüloba ajanga BCCI secretary Jay Shah-i state units dang metetdaksüoggo.

Iba dak sendakba nung BCCI president Sourav Ganguly aser secretary Shah napronglai asayartem atema asaya taa timtimba (asaya ka nung sen lakh 1.5) agütsüba Blue Riband tournament ayongzüktsü asoshi tejangraba lemsatepogo. Tanga ama tensa tamajungdang shilem ana tashi lemsatsür aliba Ranji Trophy asayamung atema ita ana tashi bio-bubble nung munga shilem agitsü ya mapa tezüba masü.

"Senior Women's One Day tournament den külemi Vijay Hazare Trophy aser iba sülen Vinoo Mankad Trophy Under-19 ayonzüktsü maongka anguba atema pelar. Domestic season 2020-21 nungi telangzübatem anguba sülen, item asayamung ayongzüktsü asoshi telemteba ya agir," ta Shah-i state unit balala dangi züluba shidi nung shia lir.

BCCI-i Hazare Trophy atema groupings aser bio-bubble inyakyimtem kasa anidaksü aser iba asayamung taruba ita nungi tenzüktsü.

COVID-19 wara ajanga thinentsür aliba asayamung tem tenzükshia asaya aruba sülen, tan season atema domestic calendar

renemtsü asoshi tetsükdaksü adokba indang Shah-i shidi nung shia lir.

"Coronavirus wara adokba ajanga mapang tajung aika süia aoba ajaki meteta dang lir, aser ibaji ajanga asayatem timtem/ tetsükdaksü kecha melii ayonga asayatetsüsa tekümdangtsü meratem nung anidaka Cricket calendar yanglutsü asoshi mepetmesü aika ajuruogo," ta Shah-i ashi.

BCCI pur AGM senden amenba mapang, asayamung season tatsüba kümra, asayartem nem temenok agütsütsü telemteba agiogo aser Ranji Trophy nung shilem magiteter asayar taa atema, Board-i asalentong ka yanglutsü, kong linük indang premier domestic cricket asayartem senotsü teyari agütsütsü sentong lir.

Syed Mushtaq Ali T20 asayamung takok ngua aachayanga agitetba atema Shah-i State Unit ajak dang pelaba metetdaksüoggo.

"Indian Premier League asayamung takok ngua asayaba sülen, Syed Mushtaq Ali T20 asayamung takok ngua asayatetba atema, State Association aser BCCI indang staff tem dang pelaba metetdaksür," ta Shah-i lemsatep.

Aruya aliba England series atema India team züngsemtem junga renemdar, ta pai metetdaksü.

"India aser England team na tsüngda cricket asayamung, koba February 05, 2021 nü nungi tenzüktsü, iba asayamung atema team anaprongla renemdar aser tawa otsüsütsüsa India team-i Australia Tour takok anguba sülen, India team pur tejangraba tulu nung renemdar. Iba asayamung nung India team-i alakteta shilem tajung agiba nguogo," ta Shah-i shisem.

Australian Open: Terepranger 30,000 melatsü

Sydney, Aenjeti/January 30, 2021 (Agencies): February 08, 2021 nü nungi Grand Slam tenzükba mapang, Australia Open reprangtsü atena anogo nung terepranger 30,000 tashi melatsü, koba taoba den medemdangra, taküm asayamung nung terepranger shilem 50% dang asütsü, ta Honibarnü, Victoria state sports minister Martin Pakula-i ashi.

Asayamung atemtsü anogo pungo lia aser asaya telemsa tajemba küma aodang, terepranger 25,000 tashi ajemtsütsü, saka Pakula-i ashiba agi, alima ajunga asüngba COVID-19 wara ajanga asayamung nokdanga arur sülen nungi iba asayamung tenzükshidang terepranger aika atsüa arutsü imla atar.

"Iba osang asadanga, anogo 14 tashi asayamung ayonga asayaba mapang, Melbourne Park nung terepranger 390,000 tashi arutsü aser tesüiba küm asem asayamung den medemdangra taküm terepranger shilem 50% alitsü," ta pai osangbener dang ashi.

"Tesüiba küm ama iba asayamung nung terepranger aika malitsü, saka terepranger densema ayongba international asayamung tongtibang ka asütsü, koba alimai tesüiba ita aika nungi mengudangi aruogo," ta pai ashi.

Pakula-i ashiba agi, iba osang ajanga Victoria nung alir nüburtemi coronavirus wara tasen azioktetba kuli sayur. Iba state nungi nisung ka dak iba tashidak putetba dak alaka

tanüngba nübur ka dak danga iba tashidak puteta mali.

Taküm indang mezüng Grand Slam asayamung asayatsü aliba tejakdang, Australia tonga aruba sülen, nisung 1000 dak tema, asayartem aser parnok den külemi teyaritepertem anogo 14 quarantine nung amungtsü asoshi tetuyuba agütsü.

Parnok rongnung, timbaka pei anenzükba hotel nungi ayazüka anogo nung ghonda pungo tashi training aser gym nung temang anepalutsü asoshi melaogo, saka tayimtsü ajanga Australia-i aruba mapang tayimtsü nung külemi amener kar dak COVID-19 tashidak positive putetba sülen, asayar 72 tashi lockdown temzüng takangba nung mungdaksü.

Marco aser Diallo dak COVID-19 putet: PSG



Paris, Aenjeti/January 30, 2021 (Agencies): Paris St Germain nungi midfielder Marco Verratti aser defender Abdou Diallo naprongla dak COVID-19 tashidak tejangja putet, ta Hokolbarnü Club sangdong ka ajanga metetdaksü.

"COVID-19 test agiba sülen, Marco Verratti aser Abdou Diallo naprongla dak iba tashidak aliba osang angazük," ta PSG-i ashi.

"Tenaprongla shinga den majurutepi anepalua amungtsü aser health protocols agi melaba ama meratem agitsü," ta kasa

sangdong nung shia lir.

France indang Covid-19 temzüng ajanga angazükba agi, COVID-19 puteter tem anogo tenet tashi shinga den majurutepi amungtsüla.

Deobarnü (31.01.2021) Ligue 1 table nung temaba jenjang tongteta alir, Paris St Germain-i table punglanglen tanabuba jenjang nung alir Lorient den asayatsü aser February 07, 2021 nü Olympique de Marseille den masayadang, aruya aliba Bodhbarnü par teloki Nimes den asayatsü terenemba lir.



Tuli Badminton Association ajanga January 28 & 29, 2021 anogotem nung 1Buba Tuli Badminton tournament ayongzükba liasü. Iba asayamung nung mezüng jenjang Sunep Imsong & Toshi (Tuli) aser tanabuba jenjang Pursungit & Tinurenba (Chuchuyimpang) nungeri nguteta liasü. Noksa nung takok angur den asayamung ketdangsür külemi tangokba angur.

BILEMDANGANG

"Pei ajangzüktsü dang bilema yimsüsüra alizüng metongteter."